



15. februar 2017

UPA 2017/41

Inatsisartut suleriaasiat §33 naapertorlugu aalajangiiffigisassatut imaattoq saqqummiuppara:

Meeqqat atuarfianni fagini tamani akunnernut ilinniartitsiviusussanut minnerpaaffiliinissaq anguniarlugu inatsimmut atuuttumut allannguutissatut siunnersuummik saqqummiussinissamut Naalakkersuisut peqquneqarnissaannut inatsisartut aalajangiiffigisassaattut siunnersuut. Inatsisip allanngortinneqarneranittaaq akullerni atuartuniit tulluttut danskisullu akunnerit ilinniartitsiviusut amerlaqatigiilernissaat qulakkeerneqassaaq. Allanguut aggustimi 2020-mi atuutilissaaq.

(Inatsisartuni ilaasortaq Mimi Karlsen, Inuit Ataqatigiit)

Tungavilersuut:

Meeqqat atuarfiat pillugu Inatsisartut inatsisaanni nr. 15, 3. december 2012-meersumi § 7-mi imm. 1-4-mi meeqqat atuarfianni ukioqatigiinni akunnernut ilinniartitsivissanut, tiiminut, tamarmiusunut minnerpaaffisaliineq aalajangersagaavoq. Taamaasilluni faginut assigiinngitsunut tiimit qanoq agguataarsimasuunissaannut kommunit namminneerlutik aalajangiisinnaapput. Taamaanneranilu fagini assigiinngitsuni ilaatigut naggataarutaasumik misilitsiffiusussani tiimit atugassat minnerpaaffilerneqarsimangillat.

Meerartatta pitsaanerpaamik atuartinneqarnissaannut pitsaanerpaamillu pissarsinissaannut qulakkeerinninnissamut tamatta isumaqataavugut. Siunnersuummilu matumani meeqqat nunatsinniittut tamarmik, sumiikkaluarunik pitsaanerpaanik pissarsiaqarnissaannik qulakkeerinninnerunissaq kissaatigaara. Nunarsuarmioqatigiinni imminnut qanilliartuinnartuni pitsaasumik atuarfeqartitsinikkut meeratagut siunissaannut isumannaannerusumut piareersarsinnaavagut. Taamaattumillu oqaatsit immikkut eqqarsaatigalugit minnerpaaffiliinissamik aallussinissarput pilersitsinissarpullu kissaatigaakka.

Meerartatta allat oqaasiinik pikkorinnerulernissaat tamatta anguniagaraarput. Tuluit oqaasii nunarsuarmioqataanitsinni sulii annerusumik pisariaqartikkiartuinnarpagut, meerartatta ilinniaqqinnissaminnut atorluarsinnaassavaat, nunarsuarmi pisunut malinnaanissaminnut atorluassavaat, siunissami suleqatissarpasuvagut tuluit oqaasii atorlugit attavigisarnissaat qularnangilaq, kiisalu nunarput takornariaqarfittut periarfissanillu allanik ulikkaartutut ineriartorteqqissagutsigu oqaatsit arlallit atorsinnaanissaat pisariaqarluinnarpoq.

Ilaatigut eqqartorneqartarpoq danskisut oqaatsit tuluit oqaasiannit taarserneqartariaqartut. Danmarkimiit avissarnissaq namminiilivinnissarlu eqqartussagutsigu danskit oqaasii kisiisa aallaavigisinnaangilagut, taamaattumillu siunissami atorluarnerulersinnaasatsinnik periarfissanik allanik annertusaanissarput eqqarsaatigisariaqarparput.

Tamannaassaaq alloriarneq siulleq pitsaanerpaarlu tigusinnaasarput. Oqaatsit taakkua meerartatta amerlanersaannut takornartat oqaasiisut inissisimmamata, meeqqat atuarfiini danskit tuluillu oqaasii naligiimmik inissillugit.

Nunatsinni aqutsinikkut allaffissornikkullu danskit oqaasii inituupilussuupput, tuluilli oqaasii nunarsuarmi, attaveqaqatigiittarfinni, nipilersukkani, filmi, politikikkut, niivernikkullu initunerujussuullutik.

Uagut politikikkut suliassaraarput namminiilivinnissap tungaanut meerartagut piareersassallutigut, taamatullu piffissami aggersumi kalaallit ilinniarluarsimasut amerliartuaarnerini allaffissornikkut aqutsinikkullu atorfiit kalaallisut tuluttullu oqallorissunik taarseriartuaassallugit. Taamatuttaaq danskisut piginnaasaqarluarnikkut Danmarkimi akeqangitsumik ilinniagaqarsinnaanermut periarfissagut attatiinnarsinnaassavagut, kiisalu Naalagaaffeqatigiinnermi ilaqutariittut attaveqarnerput aamma attatiinnarsinnaallutigu.

Pisortanut aningaasatigut allaffissornikkullu kingunerisassat

Inatsisip atuuttup allangortinneqarnissaanut suliaq AC-ip ukiumut sulinerata ¾-ianik naleqassangatinneqarpoq, tassa 375.000 kr.-inik. Aningaasat taakkua allaffissornikkut atugassat iluanniissinnaasut naatsorsuutigineqarpoq, allaammi immaqa meeqqat atuarfiannik pitsangorsaanissatsinnut aallartereersumut ilanngunneqarsinnaallutik.

Siunnersuummi matumani tiimit atuartitsiviussussat amerliniarneqanngillat.

Naalackersuisoqarfiit aqutsisoqarfiillu taakkuupput ilisimasassanik ilisimannittuusut, taamaattumillu fagini assigiinngitsuni tiimitigut minnerpaaffiliinissami siunnersuisinnaasut, tassa ilikkagassatut pilersaarutit naapertorlugit meeqqat ilikkagaqarnissaannik qulakkeerinnittumik.

Naatsorsuutigisariaqarparput malitassat maanna atuuttut tassaasut atuartut ilikkagassaminnik ilikkarnissaannut naapertuuttumik tiimeqartitsisuusut. Taamaattumik fagini ataasiakkaani minnerpaaffiliinissami ullumikkutut atuuttut tiimit tamakkiisut amerlanerunissaannik naatsorsuuteqartoqanngilaq.

Akerlianilli kommunit ilaanni tiimit agguataarsimanerannut allatut pingaarnersiuinissaq pisariaqartinneqarsinnaavoq. Ataatsimut isigalugu akissaatinut aningaasartuutitut tamanna sunnuteqassangatinneqanngilaq, taamaattorli ilinniartitsisut pisinnaasaasa allatut atorineqarnissaannut pisariaqartitsisoqarsinnaavoq.

Tamatumunnga aningaasartuutissat qulakkeerinnittumik annertussusilerneqarsinnaanngillat, siunnersuutilli matuma atuutilernissaanut piffissaq suli ungasimmat, kommunini nalinginnaasumik ilinniartitsisut atorfinittut suliunnaartullu ingerlaarneranni minnerpaaffiliissutit piareersarfigineqarsinnaassapput.

Tamannalu pillugu inatsisip allannguutissatut siunnersuutip matuma suliarineqarnerani kommunit soqutigisallillu akuutinneqarnissaannut sakkortuumik kajumissaarivunga, tassa pineqartut tamarmik piareersarsinnaanissaannut periarfissillugit.

Namminersorluni inuussutissarsiuuteqarnermut aningaasatigut allaffissornikkullu kingunerisassat

Soqanngilaq

Innuttaasunut aningaasatigut allaffissornikkullu kingunerisassat

Soqanngilaq, taamaattorli fagini taakkunani naammattunik tiimeqarnissamut atuartut qulakkeerinninnerusinnaapput.